

吳郡西山訪古記

附鎮揚遊記

根源自署



地 750.22
179.95.1
部 =



吳郡函山訪

古野 附鎮揚游記

曠衝李曰瑛署



上海泰東書局出版

吳郡西山訪古記序

騰越李君印泉以滇南奇傑爲吳下賓萌胥疏江湖蟬蛻塵滓循陔絜養補廣微之詩涉園自娛開泉明之徑琴樽高會花鳥助其發皇裙屐相要漁樵相爲唱和陶陶然不知其爲故將軍眞宰相焉君神觀聰強精力殊絕凡輅車所歷斥候所經嘗慕畢秋帆阮芸臺之爲人搜剔貞珉提倡風雅神游造化足徧名山文采炤於巖阿芬芳溢於蘭芷比者脫離塵網汗漫滄江瞻古德之道場訪名賢之祠墓鬼神感靈而來告者獻斂手而交推成吳郡西山訪古記四卷虎阜一隅厥稱勝地氈帷在握石墨斯呈懸崖之書披藤蘿而湧現題名之記別落蘇而如新方諸前賢藏皮逾倍成虎邱金石經眼錄一卷南徐古郡汲江心之寒泉廣陵陝區攬蜀岡之幽勝巾幘戾止以伸壯懷山水有靈亦驚知己成鎮揚游記一卷曾不數稊裊然巨帙洵藝林之淵匯抑掌故之琳瑯矣噫滄海橫流風塵瀕洞灌陰忘機之喻莊生逍遙之篇知也無涯同斯感喟云民國十五年丙寅冬至後十日張一麐

序二

曲石李公挂冠隱吳門時芒屨携短童徒步數十里蒐貞石尋廢寺瞻拜先賢塚墓以是胸

吳郡西山訪古記

序跋

中掌故比吳郡諸老宿尤爲翔實乙丑之夏余避暑耦園公乃長嘯入吾廬因披襟踞胡床把酒談論移晷余聞曲石名以爲其人大河喬嶽深阻難量顧簡易諧謔如老名士居常自付以爲異先是癸甲之交余結吳門諸賢爲消寒飲是歲仲冬公遂題名入社公屢欲跡清代經師惠定宇紅豆山莊故址余言在今唐家坊聞紅豆猶存數歲一作花亦未之往求也於時燕趙齊楚之郊戎馬縱橫中原無主或者議迎黃陂正法統黃陂朝入都暮必以公正揆席公顧蕭然不問外事日對客飲醇酒評量書畫金石丙寅暮春余既遷宅新橋巷牡丹紫藤方大花宅故經師陳碩甫祖第碩甫名亞惠氏乃邀公觴飲門者以公遊鄧尉辭兩句不返客有笑而言曰久蟄者思啓久懣者思噓尺蠖之屈所以求伸公之不能忘情於用世也其將微服以赴津門乎或信之或疑之一日余復結諸賢爲獅林餞春之飲題詩未半而公掀髯排闥入室手一冊示座人蓋公之載酒買艇挾兩健僕而西也太夫人亦不之知荒山破寺披榛叢剔蘚蹟甄錄宋以來石刻無遺歷訪先賢兆域百餘所憑弔其松楸而徘徊其綽楔其或幽隱芒昧則諮於亭長野老證以史志相其陰陽間得佚石於畦隴間於是韓襄毅徐武功董香光錢湘舫王惕甫曹貞秀夫婦諸墓近百年來文人學士課虛叩寂於荒

徑窮谷繭足不知其所往。一旦骨脈呈露，昭晰無疑。其尤久且遠，如吳朱桓、梁陸雲、公錢氏元璋、佳城幽壤，縣歷紀祚，亦復披豁以詔當世。公之功於是爲勤。公於經師定宇之墓，入鄧尉往返三求，他如范文穆、吳文定、都元敬、祝京兆、周天球、姜貞文、蒼雪禪師諸埋魂瘞骨之地，皆蒼烟蔓草，邱壠平而碑誌磨滅。吳都二公尤疑守護者乘子孫之彫落，發塚而售地與人，其迹猶可推也。拊膺悲歎，誓他日贏糧樸被，重入西山以發其覆。而於一代經師惠定宇之墓，尤耿耿若膺巨疚，負重責，期於必護。余因謂公段金沙之沒焉，葬於虎邱，虎邱去城咫尺，今疇諮故老，無以指其處。唐子畏之友張夢晉與崔瑩爲情死，子畏爲之合葬於玄墓山，中山中之人不知也。公既據懷舊之著念，發思古之幽情，精誠感通，鬼神必將來告。西山之遊，都二十日，凡登陟訪問，櫛沐之艱且劬，備於記爲一卷。公在滇南，旣徧求前賢窀穸之地，而表之官於粵，曲江之墓，賴公以顯於世，釐剔其侵地，修復而供祭掃焉。人之好古者，摺文考獻以求娛悅，公乃敝筋骸，劇心慮，旅食所至，必盡取古人藏形之兆而封拜之，使來者必敬必式，苟長逝者而有靈，九原之下，其將感涕而無以爲報耶。公曰：子宜爲我序，因撮其巔卒以告吳中士大夫，庶幾其能繼公而起焉。丙寅孟夏吳江金天羽。

吳郡西山訪古記

序跋

二

序三

吳郡西山訪古記四卷，都四萬餘言，騰衝雪生李君丙寅春暮至夏初二十餘日中往游吳郡西山所記也。其游以訪山中祠墓碑碣爲幟，志名人淹佚之墓，多剔榛莽而始得之。又亟慨山氓爲人守墓者欺隱盜賣，平冢抉石之無狀，不惜垂涕泣而道之。懿夫，仁人君子之心也。慨自冢人墓大夫之職廢，雖防護之禁，上宣而下率悖之。是在爲子孫者與其地之賢士大夫隨時加之意而已。雪生曩在滇，修大理洪武中大軍封邱，昆明孫清愍傳忠壯祿豐王文毅諸墓，於清愍且爲之立碑，在嶺南修曲江張文獻墓祠，所爲視此者未易一一數也。良由仁心義尚，觸發秉彝，非有所爲而爲，而猶有譏雪生爲好名者。吾不知其何心。近歲滇會西山有游僧踵楊璉真伽故轍，當事若罔聞知，物議譁然。則且爲之辯護，嗟呼！人心之不同，誠如其面，而雪生偶乎遠矣。丙寅六月六日石禪老人趙藩書於昆明東華別墅之詩境軒。

序四

自段氏毀法釀亂，亂以浸長，警告頻申，充耳不聞。越歲丙寅，燕趙齊楚，戎馬徧郊，而生民之

禍亟矣、吾友李子印泉、以手創共和之人、今乃退隱吳門、天心其未厭亂乎、雖然、豪傑有爲之士、絕不隨氣數以銷沈、而置斯世斯民於不顧、故必隨地有以自見、莫不關於人心風俗、足以觀感興起者、非僅如文人墨客之嘯傲登臨、販賣骨董之蒐討故實已也、印泉茲以其吳郡西山訪古記、三卷、問序於予、予閱盡而喟然曰、吳俗掘墓之慘、乃至於是乎、仁人孝子將何所措其親乎、木本水源之思不幾窮乎、今得印泉是記、爲之發伏摘奸、庶冀人心之一悟、末俗之一改也、夫君子不以天下儉其親、凡可自致者、宜無弗致也、乃有坊表則摧之、有翁仲石獸則仆之、有碑碣則斷之、磨之、棺則劈之、骨則暴之、斲坊頭、轟廩以基墻、蓋圍石方、磚以砌路、凡所以殘毀夷滅之者、無不至、死者何辜、遭此荼毒、嘻、其甚矣、縲彼墳客、斷其脰、碎其軀、不足以蔽其罪、吾嘗聞昏夜盜塚者矣、茲乃白晝集衆、明目張膽而爲之、名賢勝蹟、悍然剗削、他更何論、魑魅魍魎、恣肆橫行於天下、吁、不其異歟、周禮冢人掌於地官、誠重之也、比長閭胥師族黨正、皆鄉大夫以佐治、而宣教禁奸者也、今皆亡矣、曾子曰、上失其道、民散久矣、方望溪先生謂朋友散無講習、宗族散無親睦、邱墓散無祭掃、今吳中邱墓、豈止散焉已乎、是大罪重戮、又不僅在墳客也、他如樞淹不葬、道穢不除、歛財信邪、諸敝俗、皆爲

吳郡西山訪古記

序跋

三

民害、能如印泉所記、別釐革正、則導迎善氣、消彌劫運、此其嚆矢矣、邦人士曷急起而圖之、浮屠經三宿者、卽戀戀有情、予於癸亥甲子間、主印泉廬廬者年餘、今故就是事而極論之、以譏吳中士夫之讀是記者、印泉心契往哲、精誠所積、鬼神來告、今所訪而未得者、終將有得之之日、况觀感興起者之必有人乎、至謂徐文靖宜從明諡、俟齋不宜入清志、陳傳敏子孫宜絕徐有貞、皆正論凜然、有神風教、云、中華民國十五年丙寅夏五月既望、友生孫光庭序於京師淨業湖寓齋

序五

吾聞之登山臨水、抒寫其胸中之獨得、發爲文章、以備拾遺訂墜、撈奇剔異之資、固文人韻士不得意有託而逃之所爲、而非所論於一二退隱之賢豪也、然而賢豪者、流聲光愈遠、則人之耳目之也愈衆、揣測之也亦愈奇、往往蟄居廬廬、而消息傳來、行踪僕僕、爲政治而奔走、談之稿鑿如目見者、然、殊不知鴻鵠已翔於寥廓、而猶求尺鷃於枳棘之間、不亦淺之乎、視吾曲石哉、曲石於同人消寒九集後、忽動遊興、挈舟往天平鄧尉支硎穹窿天池堯峯諸山麓、探奇訪古、凡二十餘日、歸而適值獅林餞春之會、遂出遊記一編見示、都三萬餘言、姑

無論其攷訂方志、搜求碑窟、以冀保存古名賢之邱壠、功不在掩埋骸骨下、卽此曠觀遐矚、優遊於山巔水涯、以寄其翛然物外之情、真識時務之賢豪哉、此編出而耳目之揣測之者、夫亦可以少息焉矣、則謂曲石之與文人韻士不得意有託而逃之所爲、異耶否耶、吾不敢知、而曲石自此遠矣、民國十五年夏正五月吳縣亢惟恭拜序

鎮揚遊記序

昔列子好游、壺邱子曰、禦寇之游與人同、而日與人異、務外游不知務內觀、外游者求備於物、內觀者取足於身、取足於身、游之至也、求備於物、游之不至也、予嘗讀此而歎游者人所必有、壺邱子之言、可以爲游者判其得失矣、騰衝李雪生固今之好游者、以吾觀其所游、非但求諸物、蓋亦有取於身焉、曩者雪生居鄉時、所至輒訪鄉先正遺蹟、或爲之梓其書、或爲之修其祠墓、及至陝西、至廣東、其表章古人、較居鄉時尤力、今又獲睹其鎮揚游記、覽其山川、觀其風俗、摹摹其碑碣、而尤於楊文襄史忠正兩先正三致意焉、君子疾歿世而名不稱、古之得大名於沒世者、必有所以得之之道、雪生既流連慨慕不能置、則其心之欲追步古人可知也、吾嘗見抱器負才好爲大者、往往薄古昔、矚前賢、究之此身此世、若駒過隙、忽忽百年、私心所望、欲得之難於上天、及老且死、其德其業、其里居姓氏、汨焉沒焉、而彼所薄所矚者、依然如昨日、長不朽於天壤之間、若而人者、其視雪生之用心、豈不判若天淵耶、故吾謂雪生之游、非但求諸物、蓋亦有取於心焉、噫、如雪生者、始可以言游矣、丙寅九月昆明陳榮昌書於翠湖舊廬

鎮揚游記書後

雪牛簞吳郡西南諸山遊記、余既爲之敘矣、頃復以鎮揚游記見示、景賢誦古、猶前記之用心也、校讀一過、爰書其後、曰、余昔與雪生促邴雅言、人生世間、首重愛身、必抗希先正、言坊行矩、內省無慊、迺推而愛家、愛鄉、愛國、愛天下、次序之遞、以進、名實之交、相因、卽誠僞之判、然別也、雪生則不迂、余言、歷觀其近十餘年、行事有本末、風采可畏、愛其於侈口、愛鄉愛國、而行已鄙穢、苟求利己、且重困鄉國、而不恤者、誠蘇合之與蜣丸、相去不可以道里計矣、雪生納吾言而力行之、卽游記已可見、而遊記固其豹一斑、龍一爪云耳、雪生勉乎哉、不臨深、以爲高、不以歲寒而改柯易葉、敢謂能愛鄉愛國哉、求不點斲鄉國斯已矣、余老矣、視息一日、竊願與雪生共勗之、丙寅展重陽日燈下石禪老人趙藩書

吳郡西山訪古記

序跋

四

謁郝將軍李中丞墓記書後

晉寧方臘仙同學來余齋見雪生兩寄遊記大韙之因言明季晉寧郝將軍清李中丞皆殉葬吳郡而地趾未詳乞書託其親訪而詳示之將以載入邑志余書去未幾而雪生此記來讀之狂喜將軍有戰功而以節死中丞有政績而以讒隕英靈不沒固宜得雪生而彰闡之而雪生義尚之勇又豈今世所易得哉至扶植李氏孀孤則尤義精而仁至矣合江李紫璠大令故雅才循吏與余亦有舊觀其立碑種樹培護郝墓謂世變方亟恐異日遂無此人言之沉痛今竟驗矣悲夫鶴峯先生之冤獄昔侍先贈公竊聞緒論亦謂爲和珅所傾陷考滿漢名臣傳中李因培傳其辭仍多所諱雪生得事實於何種記載尤盼具鈔示我當別立一傳以傳鄉先輩之真相倘亦雪生所樂聞者余且日望之矣爰走筆而率書於記後丙寅大雪節趙藩書于昆明東華別墅之陶陶齋

虎丘金石經眼錄跋

騰衝李印泉先生來居我吳既成吳郡西山訪古記復游虎阜徧拓其摩巖題名佛幢碑版石室刻經之屬合爲一編顏曰虎丘金石經眼錄偉哉是舉蓋自光緒戊子鄉先達潘瘦羊

吳郡西山訪古記

序跋

五

博士著虎阜石刻僅存錄以來四十年無此作矣顧瘦羊之書僅斷自山門迄於劍池千人石而止就中復未能徧自搜訪多誤信拓本誤信前人著錄有分一刻爲兩刻者如賀方回題名大觀年月一行等是有誤釋文字者如王山椿題名山誤釋世等是有因兩刻同在一處而誤認異代爲同時者如錢節夫等題名明爲宋刻因下方有胡纘宗等題名而誤認爲明刻是先生親自搜訪一一攷核而駁正之其有功於碑版之學者非淺且因劍池東壁之巖有數刻埋沒荆榛間復架梯爲閣道躬自登高刪芟其荒穢叢莽而手拓之自爲題識有履險如夷不其幸歟之語其勇於任事豈我儕所能望其項背至於黃安仁等題名爲二仙亭柱掩其半先生鑿空一觀而挈家游此紹聖四年八字瘦羊僅存錄後增入佚石者赫然復顯於世不可謂非藝林快事矣又若李公晦題名蔣爾第殘刻冷然二大字以及山後山塘殘碑廢碣祠宇園林記載之屬所補奚啻百許而表彰味禪師象塔及攷定將軍葛賢墓碣俾塵霾數百年之高僧義士巍然復爲我民坊表以昌宗風而勵薄俗非君子人者而能若是歟劍池西壁古刻摧殘剝削磨滅殆盡說者莫不歸咎於光緒間浙人王成瑞獨先生能探源定讞得罪魁曰佟彭年而於王成瑞亦不容曲恕其疾惡如仇之概益足補其好

善如不及之誠，訪古記既表彰先賢祠墓，不遺餘力，此錄復旌別淑慝，得春秋褒貶之旨，非尋常金石家言可比。昔我鄉顧俠君先生嗣立，刊元詩選成，夢古衣冠人羅拜堂下，先生表闡之殷，不僅以區區文字爲限，我知鬼神必長爲之呵護矣。則履險如夷者，豈幸也哉。丙寅十一月中吳佩壽王譽敬跋。

吳郡西山訪古記跋

憶清光緒丁戊間，留學北京時，獲讀雲南雜志，刊載之滇中掌故及鄉先正詩文，詢知均騰越李印泉先生所采輯，特心儀之。迨己酉歸滇，供職圖書館，始識先生面，見先生於教育軍事之餘，凡鄉先正之遺著，輒墨，而字邱墓，或輯刻之，修葺之，抑或捐貲收歸館儲，裨益鄉邦，已難指數。逮入民國，戎馬倉皇，仍未稍輟，毅力精心，令人傾服。近年息影吳門，更進而從事國故之採訪，凡有所得，輒貽演館。今歲秋間，寄自箸吳中先後訪古記四卷，就正石禪虛齋兩師，因得瀏覽一過，愈服攷證精審，記載翔實，尤以訪獲楊文襄郝將軍李鶴峯中丞累代邱墓，及蒼公舍利塔於滇事極有關係，智素亦愛古成癖，不禁狂喜弗已。晚近歐美人士探險訪古，不遺餘力，誠以於科學有所發明也。吾國人鮮事講求，千年文物，每多棄遺，流出國外，深爲可惜。先生作記之用心，洵足以楷模全國，昭示來茲。智以嚮往日久，敬綴數語，一以識先生愛重前哲之雅，固非近賢所可企及；一以自勗仰慕先生當知所景行而不可但騰口舌云爾。丙寅長至前六日，昆明何秉智謹跋於雲南圖書館。

跋二

騰衝印泉李先生解閣後，僑寓蘇州之葑門，關圃蒔花，奉母讀書，與海內之賢士大夫游，以文字相酬酢，其於梓桑也，近師所堪師。遠法楊文襄，仕止久速，以時而不苟，其趣尚之高，迥越恆流萬萬，余嘗肅然敬之，而非阿其所好也。先生讀書之暇，訪古吳郡，撰成一書，情有吳之士大夫所不及知者，而先生均訪獲而表章之。而於吾鄉先賢尤殷殷致意，登中峯訪蒼雪法師塋，往鎮江訪楊文襄公墓，屢於所師頻羅室中獲讀其所記，憾不策杖相從，一伸牲醴之忱也。欣慕之餘，適以晉寧有郝將軍李中丞墓，均在蘇州，丐師致先生書，訪求紀述，以光吾邑。余亦附啓伸意，先生接書後，於郝將軍匪惟訪獲其墓，並訪獲其賣葯處，於李中丞先訪獲其後裔孀婦孤子，命之爲導，得遍謁其祖孫六世墓，墓石之被竊賣者，嚴令守塚人償砌，而於孤孀尤加意憫恤，冀輔其成人，以延中丞一線之嗣。沒者得以闡彰，生者賴以

吳郡西山訪古記

序跋

援助此其義尙我滇人當感慕之豈獨晉邑已哉嗚呼如先生者洵所謂身心兩遊交盡者矣當先生訪李墓之日余亦偕澄甫和甫允三小泉諸君侍斝堪惺盒兩師重遊盤龍萬松遊歸後十日獲讀其訪稿亟收入邑乘欣然而跋其後以告鄉人之眞愛滇者勿徒作口頭禪而行則病滇禍滇令天下齒冷哉丙寅冬月十日晉寧方樹梅臞仙敬跋於滇垣述古書堂之師齋

吳郡西山訪古記

序跋

七

題辭

吳縣吳穎芝丈蔭培

曲石先生以近著吳郡西山訪古記賜讀漫題小詩兩章希有道是正

濁世不可居山林締知己一生好游山古有謫僊李吾曹甘石隱放浪頗自喜著屐效阮孚
攝衣從蘇子涉巖必升頂探洞每窮底結習彼此同神州行萬里吳郊西望遠羣嵐拔地起
北踏箭缺峯南眺具區水路絕風雲通春深林壑美謝監作山賊貪游不知止相約賦登高
望古縱遐企

古人不我見尙友懷千秋名山鬱佳氣到處瞻松楸朱墩吳侍中元墓宋青州舉一可例百
故國尋荒邱大雅久不作遺型猶可求橫山北邙道結伴逍遙游世衰陵谷變誠至金石留
雷雨弗迷麓神鬼能通幽謂近日結伴冒雨入山訪墓得
碣誌並曲石舟中夢兆事達人銳進取巖穴拌窮搜蟲沙慨時局
雞酒聯朋儔共攜濟勝具吾生未行休

吳縣彭雲伯先生清鵬

奉題曲石閣揆西山訪古記暨鎮揚游記

吳郡西山訪古記

題辭

好善優天下吾聞子輿言讀公記游作惻悱識心源昔賢久寂滅樵牧荒丘壖此何預人事
搜訪躬其煩或謂據幽情聊慰往代魂不然市駿骨藉昭國士恩凡茲管蠡測未知公所存
休休方寸地造次同春溫九原歸隨會百世思楚元匪曰以示惠中情不可諉芝蘭等臭味
葛藟庇本根區區一編書足規德業尊古來雜地志作者不乏人昌平山水記先後堪比倫
嶺表錄異物洛陽述名園徒誇巨麗觀彼哉安足論

吳江費韋齋先生樹蔚

印老示我游記一編其訪吳中先賢冢域可謂勤矣感而有作

老去尋山報國恩此不知何人詩左
文襄每喜誦之古人懷衰何清壯李公避喧迥殊俗杖策荒山問幽壙吳

兒足跡不能到白楊叢莽森在望陰風慘澹狐兔窟崩崖綻裂蝮虵藏豈知中有槃槃翁鐘
漏既歇天所放當時漆燈照山明今日麥飯無人餉仆碑平壘作奇貨山賊傳心成業尙對
此茫茫心骨悲歎息王孫勅僕葬英賢名姓猶翳如何況富貴來以儻李公精誠感鬼物尸
氣觸鼻神彌王夜來大聲撼枕起似有千夫浩誦唱一人鞞袍跨雲立鬚髮颯爽偉然狀導
公經行不知處既寤復夢今未忘意者其餘文靖歟曠代論交丈人行印老訪侯齋先生父墓之
夕兩夢所見如此疑紅

袍人為侯齋父文靖公也、印翁十世祖鍾英府君、亦明遺臣、叩虛發寂他亦勤、胼胝知費屐幾緡、後來故于侯齋尤致虔焉、此節為記中所無、印老告予云云、

弔古庶有徵、所求未得輒愴悵、尋范文穆吳文定諸公墓不得、而以真宰上訴天應泣、成、句、霸才銷

鑠為漫浪、羣龍無首正此時、近游兼旬人謂誑、時合肥遜荒、或議迎黃陂入都、印老為黃陂元揆、適出游兩旬不歸、吳人疑其北行有遠志、予力辨之、

歸成此編示坐客、始知公真我豈妄、安心是樂閒是福、絕倒槐宮取卿相、烈士名心磨不盡、

記取穿塚要離傍、梁鴻語、百年一坏我與公、隻雞斗酒誰來訪、

吳江周迦陵先生麟書

敬題印泉先生吳郡西山訪古游草

天下駿馬善馳突、追風逐電不可勒、天下俊人愛遊逸、梯山航海不可測、我愛長安李謫仙、不為宰相為逋客、鳶肩鶴體龍虎姿、騰蹕中原不世出、昔曾洗甲柳天河、今復乘槎泛笠澤、何止平原十日遊、恨不南溟六月息、歸來示我書一編、吳中山水儘流連、擔囊躡屨追白日、緹籐拾級捫青天、三萬六頃視掌上、七十二峯羅眼前、側身天地一長嘯、呼吸湖光餐岫煙、歎息玄墓久荒廢、澗上草堂復何在、竭來重上漁洋山、石樓銅井空相對、只餘蕭寺志猶存、數典忘祖徒滋愧、九世從祖安期公著有聖恩寺志、今藏寺內、况復中經變故多、鄉邦文獻憑誰載、君忘跋涉杰遨遊、

吳郡西山訪古記

題辭

一一

殘山剩水勤討搜、香光荒塚待發見、漁洋山董香光墓公徵訪得實、阮亭高致憑追酬、精覈突過王鑿志、明王文恪

公著有姑蘇志、蒼茫還泛范蠡舟、書生閉戶苦咕嗶、對此能不掩面羞、讀君遊草寄君語、寄君語當

游草序、方今民力正凋傷、帶甲擐戈塞寰宇、誰恤饑寒到雁鴻、空教搶攘鬥狐鼠、婆娑風月

君自娛、整頓乾坤吾誰與、勸君莫便臥東山、應念蒼生望霖雨、

族兄希白先生學詩

讀印泉弟西山訪古記、鎮揚游記、虎丘金石經眼錄、率題附尾

雪生好與古為徒、博羅宏綱日不足、一笠一僕一襖囊、短衣芒屐戴星出、春風幾度西山游、秋水半篙維揚宿、瓣香謁徧先賢冢、更訪蒼雪中峯麓、一丘一隴細搜求、某氏某名親記錄、墟里殷勤詢野老、荒山改顏問樵牧、剖苔剔蘚認殘碑、緹險探幽萃經目、誓宣潛德發幽光、肯教一字遭湮沒、在朝在野皆此心、福利蒼生豈無術、方今詭譎起風雲、且看虎頭飛食肉、

演釋臥雲法師靜圓

謹讀西山訪古記、虎丘金石經眼錄、鎮揚游記、訖拙句題奉、即乞印泉先生教正

春寒十日不出郭、蠟屐忽作西山游、我公一生嗜金石、荒煙野莽恣冥搜、此行更似有深意、

味者但以其迹求湖波瀾汗接空遠湖山鬱律含黛浮落花深處問野老新月光時眠扁舟
水村山寺一再至斷碣殘碑精魂伴立墓香塚尙遺憾紅豆春枝猶多頭或疑忘世竟長往
稷契事業付悠悠或疑名心終未澹伊旦夢寐懸休休天生命世豈久淹時事誠非良殷憂
自古治亂非由運得人則興失則不尼父東歸訂禮樂猗蘭成操甘息陬鳳鳥河圖寄感慨
百國寶書成春秋公於異世深憑吊傷今沈寂無薪爇作人遐化既茫渺鑿齒大風淪中州
厚風正俗賴經術小儒咕嗶徒吟嘯其間真僧與遺逸堅苦卓絕誰與儔於斯表章直詔世
心火可息疾可瘳歸來正值饒春日獅林宴會羣唱酬袖中奇文春夏氣驚詫相賞欣夷猶
游興未闌歲月速倏然天地清商道虎阜石露捲蘿薜懸崖字出森銀鈎鶴林木落霏煙雨
古井泉清鳴琅璆金焦奇蹟歸掌握耳目清曠心神幽中冷近旁郭公墓北固高倚多景樓
遂翁相業綽楔圮坡老遺徽玉帶留揚帆更越揚子口李白昔年津吏愁鐘聲菜蕘灣畔迥
樹影平山堂外稠蟲沙沒後血成碧燕子歌殘金缺甌江南自昔多文獻誰能從公低昂收
農圃聖門大學問巖壑我輩真經猷西山薇蕨莫清苦東山琴酒長風流落落大册三萬字
橋舌呿口故老羞圖經遠過杜陵老游記直超康樂侯剪燈擁爐翻覆讀精光鑠二寒射眸

吳郡西山訪古記

題辭

三

每當得意輒起舞如聞如意聲颺颺几筵但揖霞客進簡牘欲與酈元謀定採金匱貯石室
何止方言推軒轅

劍川趙介菴夫子藩

安寧楊文襄公僑家京口呈貢蒼雪大師示寂中峯近雪生弟訪其宅第墓塋各有紀
載誠愛演景賢之盛心也賦詩美之

僕指朱明一代雄儒臣衲子抗滇宗隱猶憂國吟蒼雪徒不忘鄉勝石淙丁卯橋荒遺故第
甲申變劇老中峯重君訪墓尋碑意恨不吳門共策筇

丹徒陳進宦先生直

丙寅仲夏奉題印泉閣揆吳郡西山訪古記

回首弓衣點雪花將軍六郡是良家不看肘後黃金印援臂摩挲石墨華
石洞楓橋屐屢經郵書看帶墨花馨支硎山下停驂久來訪維那造像銘
膏濃分陝起名譽退食吳閩奉板輿若向乾嘉求彷彿靈巖山館畢尙書
紛紛謠詠日邊還幾輩如公擁鼻閑霖雨蒼生安石事西山它日出東山

梅縣李崧圃先生維源

奉讀雪生先生鎮揚游記賦呈小詩卽希賜教

此行風月且勾留、跌宕身如不繫舟、記取金焦青數點、白雲疎處笛聲秋、
文章金石喜開函、無數煙巒蔽草菴、竹雨松風誰管得、山僧相伴話江南、
綉屐來游北固山、又移帆影綠楊灣、過江載酒陶然醉、虎嘯西風戴月還、
塵起中原急羽翰、南朝烟雨久荒寒、可知湖上騎驢客、曾領旌旗樹一韓、
吳縣尤賓秋先生志達

丙寅消寒二集讀西山訪古記歸途口占絕句錄呈闕園主人教正

竭來林屋寄幽情、一棹蒼茫煙水橫、試向洞天搜秘篋、令威定有丈人迎、
韓陵片石重兼金、訪古懸知食古深、珍護莫教牛礪角、樵蘇禁采是仁心、
盪薇洛誦紀遊篇、如數家珍歷歷然、從此三吳添掌故、會昌一品續編年、

吳郡西山訪古記

題辭

四



吳郡西山訪古記

騰衝李根源印泉稿

卷一

入春以來閒居多病、新瘳無事、偶景獨游、茲游主於訪碑、並謁前賢丘墓、故所記以此爲限、山川之勝、遂以略諸、庶思古懷舊、與余同好者、或有采焉、

民國十五年丙寅二月二十九日、即陽歷四月十二日、晴、

豫定游靈巖山、訪韓蘄王、唐子畏、徐忠純、徐文敏墓、

午前十時、携僕從二人、至胥門棗市橋、買小舟西行、擬先至橫塘謁唐子畏墓、乃登舟後、沉酣大睡、醒問舟子、云已至西跨塘矣、右岸爲明光祿寺、卿徐忠純公如珂墓、建有華表、石馬、石羊、石獅、則傾仆兩側、右去十數丈、又一坊爲忠純先墓、惟墓之四周、叢莖纍纍、忠純平水西奢亂、功在川滇、郊餽楊漣、尤人所難、渡河左岸、有姑蘇廟、在田溝村東端、殿宇卑陋、塑神像奇誕不經、非夫差象、庭植羅漢松一株、大數圍、百年前物、土人云、去此二里許、和合山半、有姑蘇臺、至則巨石峭拔、有石池、石壁、皆人工造作、非天然物、臺四周隱隱有舊建築遺蹟、臺內外叢塚數十、左隅有僧塔、新爲人掘其前石、白骨立缸中、余與童僕負石掩之、村民云、

吳郡西山訪古記

卷一

此山現歸船方頭人管業、其確爲姑蘇臺遺址否、待攷、途次有陸氏坊墓、並祠、又有貝氏墓、舟抵木瀆、經法雲寺、門額及大雄殿、亂、潘遵祁書、有重修法雲寺碑記、道光十年、中州熊傳栗撰書、寺寂靜、前江蘇巡撫程雪樓德全、嘗居此念佛、過堞樓、是樓於史蹟中關係至大、明嘉靖三十四年、蘇州府同知任應乾環、殲日本兵數千於此、屋燬於咸同間、樓基尙在、江蘇臺營局售與咸慶堂、木瀆紳民醮資贖回、旁建有碑、新安公所西有順治七年蘇州府知府頌功德碑一石、舟泊山塘馮林一先生桂芬故宅前、宅舊屬沈文愨德潛、後歸林一先生、葉鞠裳學使昌熾自隴上歸、曾寄寓於此、著語石焉、游羨園、園舊名端園、錢端谿舊築、清末歸嚴氏、改今名、友于書屋額、石韞玉書、環山草廬、陳鑾題、乏人經紀、漸榛蕪、殊可惜也、經嚴氏百歲坊、垂陰萬古亭、行里許、至宋韓蘄王饗堂、堂在寶藏菴內、奉蘄王塑象、有明石一、曰、宋韓蘄王廟記、嘉靖戊子春二月望日、浙江布政使司右參政天水胡纘宗撰、四川順慶府知府郡人皇甫錄書、直隸蘇州府通判瀛海尙堂篆額、清石八、一、韓蘄王墓記、明邑人張習撰、道光庚寅春暮、韓對附跋重刻、嚴承益書、丹並篆額、二、重修韓蘄王墓、並建饗堂記、道光十三年癸巳夏四月、前署兩廣總督韓對撰、候選教諭顧翔雲書、丹、三、韓對始謁蘄王墓、又題

蕪王墓圖詩刻、四、重修韓蕪王墓並建饗堂記、道光十三年十一月、吳縣縣丞袁縉撰、五、宋韓忠武蕪王祠墓記、道光十七年丁酉孟夏月、撫吳使者陳燮撰、江蘇布政使怡良書、丹、六、嘉慶二十三年十一月、重修吳郡靈巖山華藏菴、江南總河部堂徐太太捐金刻石、七、靈巖山寶藏菴記、道光十年庚寅孟春、僧開悟撰、內閣中書國史館分校官吳縣潘曾沂書、丹、八、寶藏菴飯僧田記、道光十年秋八月、僧開悟撰、書、共九石、林則徐聯曰、祠廟肅滄浪、更尋來一萬字穹碑、彩煥巖前棟、威名震吳越、還認取七百年華表、遙傳江上旌旗、陳燮聯、高塚臥麒麟、回首感六陵風雨、神絃傳霹靂、歸魂思一曲滄浪、石韞玉題額曰、靈佑胥臺、堂中停柩十餘、惡臭逼人、不能耐、向西北行半里許、有韓蕪王神道碑、碑與龜趺高三丈餘、上題中興佐命定國元勛之碑、中刻四小字、曰、選德殿書、淳熙四年二月、趙雄奉勅撰、周必大書、八十八行、行百五十餘字、字過小、半已模糊、當日選石雄偉可驚、而質不堅賦、未千年而全碑滿現裂紋、字小之故、由於碑文太長、額字太大、又不曉兩面鑄刻之法、天已黑、歸宿舟中、

三月初一日（十三日）晴

豫定遊靈巖山、白陽山、穹窿山、訪韓蕪王、徐文敏、陳道復墓

吳郡西山訪古記

卷一

二

午前七時入山、謁蕪王墓、墓在神道碑西北半里許、有墓道坊、墓碑刻宋韓蕪王墓、陰鑄道光間續修督工官吏姓名、拜祭畢、由佛日巖登山、尋東坡摩巖披雲二字、未獲、至山頂入靈巖寺、存宋石六、一、信士朱隆并弟僧德涸捨莊田記、宣和壬寅正月日日、住持傳法賜紫覺海大師法泉立、二、宣和五年二月、靈巖山秀峯寺住持傳法賜紫狀、三、紹興五年五月、白玉觀音象、四、乾道三年十二月、前住當山廣照和尚忌辰追修公據、五、楷書金剛般若波羅密經二石、六、入定觀音象、慈受贊、清慎刻石、明石三、一、正德辛未三月三日、監察御史廣信謝琛經靈巖詩刻、二、正德己卯中春二十一日、提督江南水利工部郎中前監察御史上雲朱袞靈巖懷古又出胥口探玄墓詩刻、三、萬曆戊寅六月、許太僕五律一首、文教諭書、心經合刻、清石四、一、先密老人住靈巖開濟宗記、己亥立秋後三日、傳臨濟正宗三十二世住天台國清靈巖弘譚、二、法祖圓悟禪師傳道記、己亥立秋後三日、傳臨濟正宗三十二世住天台國清靈巖弘儲撰書、己亥、爲康熙十六年、遞退兩公、侯齋志友、明遺僧也、故書甲子不書紀元、三、靈巖飯僧田碑記、嗣席住山第五人、雪菴殊致述、上段刻買田實數、四、康熙六十年閏六月、常總督禁山探石令文、共十三石、又清行宮前倒仆御製碑二石、登鐘樓訪塔、塔九成、宋太平興國

間建、轉至館娃宮遺址、觀吳王井、硯池、度石城、登琴臺、有明太僕寺少卿都穆題名、再上刻琴臺二大字、僧云王文恪鑿所書、第姓名已剝泐不明、遙看太湖萬頃、烟波浩渺、洞庭諸山、匍匐足下、信地之高且勝者也、曾流連久之、下山尋畢、秋帆制府靈巖山館廢址、館居山東南面、占地四五十畝、瓦礫滿山、牆基房址、池橋假山、均可辨認、嘉慶間、歸常熟蔣氏、蔣墳葬館之東北隅、有石馬石羊石獅臥道旁、左上西施洞、有權部馬之駿、捐俸贖山禁採石刻字、石鼓上有清布政慕天顏贖山禁採石刻、沿山東行、經迎笑亭、訪明徐文敏縉墓、文敏、王文恪婿也、有坊石馬石獅石羊、翁仲極偉大、尙完好、墓右碣題明少宰諡文敏子容府君墓、吾鄉楊文襄公有薜荔園詩十三詠、贈子容侍讀、極稱許之、未知水鑑蕉石諸勝、今猶存西山否耶、又西南行、訪詩人張永夫墓、墓門吳蔭培書、墓碑雍正三年立、陳炳隸書、墓前植梅十餘株、右傍溝渠、故沮洳異常、歸羨園、登舟西行、經香水溪、石馬頭、近年江浙上海建築多採用焦山石、村上沿河堆石數百萬件、運石船達二三百艘、石工力夫四五千人、至塘灣、有惠氏廢祠、昔聞惠定宇經師棟先世居東渚、疑此卽其家祠、詢鄉人云、此地對河、僅有惠姓一戶、世爲農家、餘不之知、北行入白陽山、訪白陽山人陳道復墓、並山人五湖田舍、不得擬

吳郡西山訪古記

卷一

三

俟歸途再訪之、入御道、至廟山有紫泉院、壁陷康熙甲子、康熙三十六年、乾隆壬午三碑、院旁有清安徽寧池太廣道陸公海峯墓、舟泊善人橋、登陸游穹窿、過寶甯寺、入谷、旁建顧子山方伯副室樂善好施坊、直上有涼亭、半山泉、南天門、兩山大樹參天、杜鵑盛開、至可玩愛、抵上真觀、時際香期、遠近男婦老幼來者、約二三千人、山門嘈雜如市、云每六十人合一組、設醮一壇、每壇觀中收費二百四十元、日有三四壇之多、山門天庫、紙錢灰山積、迷信如斯、可愍極矣、觀中存清碑八、一穹窿山上真觀碑記、順治十七年歲次庚子四月、□□□□□□□□撰、禮部儀制司員外何棟篆、兵部觀政進士蔣德峻書、茂苑章堪錫、二穹窿上真觀碑記、順治辛丑仲夏、蘇松兵備道余廉徵撰文、吳縣知縣任維初篆額、遂安縣知縣雲間曹垂燦書丹、三穹窿山上真觀碑記、康熙元年歲次壬寅臘月穀旦、戶部清吏司郎中督理澹野鈔關瘦陶王元晉撰文、日講官翰林院編修沈世奕篆額、吏部考功清吏司郎中顧贊書丹、四穹窿山重建上真觀碑記、康熙三年歲次甲辰孟秋吉日、予告太傅兼太子太師吏部尙書中和殿內秘書院大學士金之俊撰、蘇州府知府吳道煌書丹、吳縣知縣郭宸躬篆額、五奉免穹窿山上真觀齋糧田差徭碑記、康熙十八年十月日、江蘇巡撫慕天顏給帖、天

師府知事沈如璧、本山住持朱守賢、石如珍同立。六、穹窿山井泉功德記、康熙甲申季夏穀旦、翰林院檢討纂修明史吳下馮勗撰、前雲南道監察御史息縣知縣玉峯陸經遠篆額、江蘇提舉司提舉本山嗣法口得已書丹、長洲章玖鏞、七、乾隆丁丑仲春御題詩、刻陰及左右側均分刻、清高宗御題詩八、重修茅君殿記、乾隆五十四年十一月朔、文淵閣詳校官戶部貴州清吏司主事前內閣侍讀撰、文中書潘奔雋撰、並書穆大展鑄、遂訪施道士道淵墓、登南山頂、俯瞰太湖、時天漸黑、沿山北下、趁舟至光福市、泊虎山橋、已九時矣。

初二日（十四日）晴

豫定游光福山、鄧尉山、吾家山、青芝山、彈山、銅井山、蟠螭山、玄墓山、訪徐靖節、徐侯齋、吳梅村、徐健菴、惠定宇、彭繆兩殿撰墓。

午前七時出孫家弄、登光福、鄧尉兩山夾道、至地藏禪院、又名豐樂亭、額潘霽書、西南行半里、謁宋徐靖節公墓、靖節諱揆、死靖康之難、石坊題徐氏南渡始祖墓道、內建靖節祠、壁砌洪武庚午徐處士墓志一、陸友諒撰、鄒順書、袁端隸額、成化十二年重建善慶菴碑記一、經張氏墓道、城隍廟、費家河、至崑山徐健菴尚書乾學墓、有石獅、外石坊、龜趺二、無碑、有池、內

吳郡西山訪古記

卷一

四

石坊、石馬、石虎、石羊、翁仲完好、亦最精偉、墓園刻畫工緻、惜半傾圮、又經明工部侍郎申公念先墓、念先名用嘉、時行季子、紹芳父也、至官路上、過雲石菴、菴門有古柏一株、經青芝山村、有明仁和縣知縣嚴觀墓、石亭覆墓碑銘、景泰壬申、禮部尚書楊翥撰文、刑部尚書俞士悅書、右都御史陳鑑篆額、碑字完整、無一剝蝕、左十餘丈、爲明禮部尚書吳興董公份墓、有池、有橋、有石標、石馬、石羊、石虎、石獅、翁仲等、無碑、刻制作宏偉、今頽廢、西建董氏祠、祠門題梅林世美、中庭懸白雲堂額、董氏子孫所居、業農、折往倪家巷、經香雪草堂、潘順之先生別業也、中有四梅閣、以宋人楊補之梅花卷得名、徧訪惠定宇先生墓、不獲、惠氏之學、精深博大、東南經師第一、今來尋丘隴、不可得、惆悵深之矣、乃赴珍珠隴、訪徐侯齋先生枋墓、侯齋爲文靖公汧子、墓向彈山、舊碣題明孝廉侯齋先生墓、鄉人云、覆墓之亭、吳探花蔭培建、墓則張閻如郁文修也、侯齋苦節高風、足與習齋二曲相頡頏、蘇志編入清人物、誣先生甚矣、余先十世祖鍾英、府君諱鎮雄、亦明遺臣中之苦志礪行者也、禮先生墓、曲石松楸之感、不禁油然而生矣、經銅井山、有南畝老人彭殿撰定求墓、右爲山澗、前爲大官水溝、又有明御史毛公鳳儀墓、有坊、石馬等已圯、又經吏科給事中蔣公墓、趙氏墓、貴州巡撫潘公偉如爵墓、